

44 pelajar sertai Program AFSUS2024

BINTULU: Seramai 44 pelajar tahun akhir menyertai Program Agricultural and Forestry Sciences Undergraduate Seminar 2024 (AFSUS2024) anjuran Fakulti Sains Pertanian dan Perhutanan (FSPH) di Dewan Sri Kenyalang, Universiti Putra Malaysia Kampus Bintulu (UPMKB) di sini, baru-baru ini.

Menurut kenyataan daripada UPMKB, para peserta merupakan pelajar tahun akhir yang terdiri daripada program Ijazah Sains Bioindustri, Sains Akuakultur, dan Sains Perhutanan.

Dekan FSPH, Dr. Zamri Rosli yang menyempurnakan majlis perasmian program itu berkata, penganjuran seminar seumpama diharapkan dapat membantu pelajar dan ahli akademik untuk saling berkongsi pendapat dari segi pengetahuan dalam bidang yang dipelajari.

Selain itu katanya, diharapkan pelajar lebih berkeyakinan dalam kemahiran insaniah serta menjadi pemangkin

dalam inovasi dan kemajuan dalam bidang sains pertanian serta perhutanan.

Sementara itu, Pengerusi AFSUS2024, Dr. Tan Toh Hii berkata, seminar tersebut adalah satu langkah untuk memperkasa pengendalian kursus Disertasi Bachelo di bawah Fakulti Sains Pertanian dan Perhutanan.

"Ia juga menjadi platform untuk melahirkan modal insan profesional khususnya dalam bidang penyelidikan," katanya.

Difahamkan, pengisian program AFSUS2024 terdiri daripada dua sesi yang mana sesi pertama merupakan perkongsian plenari yang terdiri daripada pegawai akademik FSPH untuk berkongsi kepakaran dan pandangan profesionalisme mereka.

Sesi kedua pula adalah sesi pembentangan poster pelajar bachelo tahun akhir yang mana mereka menunjukkan hasil kajian dan penyelidikan kepada peserta AFSUS2024.